

Inatsisartut suleriaasiat § 33 naapertorlugu Inatsisit atortinneqarnerannut ataatsimiititaliami ilaasortat matumuuna aalajangiiffigisassatut siunnersuut saqqummiuppaat:

Inatsisartut Ombudsmandiata 2011-imut ukiumoortumik nalunaarutaata Inatsisartunit tusaatissatut tiguneqarnissaanik Inatsisartut aalajangiiffigisassaattut siunnersuut.

(Inatsisit atortinneqarnerannut ataatsimiititaliap siulittaasua Isak Hammond, Inuit Ataqatigiit, Inatsisit atortinneqarnerannut ataatsimiititaliami ilaasortaq Doris Jakobsen, Siumut, Inatsisit atortinneqarnerannut ataatsimiititaliami ilaasortaq Kristian Jeremiassen, Siumut, Atortinneqarnerannut Ataatsimiititaliami sinniisussaqaq Juliane Henningsen, Inuit Ataqatigiit, Atortinneqarnerannut Ataatsimiititaliami sinniisussaqaq Atrid Feischer Rex, Demokraatit)

Tunngavilersuut:

Allaffissornikkut aqutsinerup inatsisini sinaakkusiussat iluanni kiisalu ingerlatsivinni inatsisitigut malitarsissat iluini ingerlanneqarnissaa pillugu Inatsisartut inatsisiliortutut Ombudsmandi nakkutilliisussatut suliaqarnissaanik pisussaaffilersippaa. Taamaalilluni Ombudsmandi Inatsisartut Naalakkersuisunik nakkutilliinerannut sakkuvuq, kisiannili aamma nunap inuttaasa eqqartuussiveqarnikkut illersugaanissaannut qulakkeerinnittuulluni. Ombudsmandi taamaalilluni tassaavoq *Inatsisartut innuttaasullu* ataatsimut Ombudsmandiat.

Inatsisartut Ombudsmandiat ukiut tamaasa Inatsisartunut nalunaarusiortarpoq, tassa ukiumi qaangiuttumi Ombudsmandip suliarisarsimasani nalunaarusiaralugit.

Ataatsimiinnermi tassani Inatsisartut Ombudsmandiata ukiumoortumik nalunaarusiami imarisaata ilaanik ataatsimiititaliamut immikkut soqutiginaatillit ataatsimiititaliamut paasissutissiissutigineqarput.

Ombudsmandip 2011-mut ukiumoortumik nalunaarusiaani – maannamut pisarnertut – suliart arlallit malitarsissatut tunngavimmi namminermi imaluunniit malitarsissat allaffissuutigineranni kukkunernik amigaatinillu nalunaarutigineqarsimasut ilanngunneqarsimapput.

Taamaalilluni innutaasut piginnaatitaaffitsigut isumannaatsuutinnissaat pisortatullu oqartussat suliassaminnik suliarinnittarnissaat nukittorsartuarneqaqqullugu anguniagaqarnitsinni ukiumoortumik nalunaarusiaq sakkutut ikiuutitullu atorineqarsinnaavoq.

Taamatut oqaaseqarluni Inatsisartut Ombudsmandiata 2011-imut nalunaarutaa pillugu siunnersuut Inatsisartunit tusaatissatut tiguneqartussanngorlugu Inatsisit Atortinneqarnerannut Ataatsimiititaliap isumaqatigiittup saqqummiupaa.

Ilanngulluguttaaq Inatsisartut Ombudsmandiat 2011-imi suliaanut annertuunut Inatsisit Atortinneqarnerannut Ataatsimiititaliap qujassuteqassaaq.